



文選正文

山子點

13
十二

~ 16
3275
13



16
3275
13

文選正文卷之十一

連珠類

演連珠五十首

陸機

臣聞日薄星迴穹天所以紀物山盈川冲后土所以播氣五行錯而致用四時違而成歲是以百官恪居以赴八音之離明君執契以要克諧之會

臣聞任重於力才盡則困用廣其器應博則凶是以物勝權而衡殆形過鏡則照窮故明主程才以效業貞臣底力而辭

豐

臣聞髦俊之才世所希乏丘園之秀因時則揚是以大人基命不擢才於后土明主聿興不降佐於昊蒼

昭和29年5月6日
今田千代

臣聞世之所遺未爲非寶主之所珍不必適治是以俊乂之
藪希蒙翹車之招金碧之巖必辱鳳舉之使
臣聞祿放於寵非隆家之舉官私於親非興邦之選是以三
卿世及東國多衰弊之政五侯並執西京有陵夷之運
臣聞靈輝朝覲稱物納照時風夕灑程形賦音是以至道之
行萬類取足於世大化既洽百姓無匱於心
臣聞頓網探淵不能招龍振網羅雲不必招鳳是以巢箕之
叟不盼丘園之幣洗渭之民不發傅巖之夢
臣聞鑒之積也無厚而照有重淵之深目之察也有畔而眦
周天壤之際何則應事以精不以形造物以神不以器是以
萬邦凱樂非悅鐘鼓之娛天下歸仁非感玉帛之惠

臣聞積實雖微必動於物崇虛雖廣不能移心是以都人冶
容不悅西施之影乘馬班如不輟太山之陰
臣聞應物有方居難則易藏器在身所乏者時是以充堂之
芳非幽蘭所難繞梁之音實縈絃所思
臣聞智周通塞不爲時窮才經夷險不爲世屈是以陵颺之
羽不求及風矐夜之日不思倒日
臣聞忠臣率志不謀其報貞士發憤期在明賢是以柳莊黜
殞非食瓜衍之賞禽息碎首豈要先茅之田
臣聞利眼臨雲不能垂照朗璞蒙垢不能吐輝是以明哲之
君時有蔽壅之累俊乂之臣屢抱後時之悲
臣聞郁烈之芳出於委灰繁會之音生於絕絃是以貞女要

名於沒世。烈士赴節於當年。

臣聞良宰謀朝，不必借威。貞臣衛主，修身則足。是以三晉之疆，屈於齊堂之俎。千乘之勢，弱於陽門之哭。

臣聞赴曲之音，洪細入韻。蹈節之容，俯仰依詠。是以言苟適事，精麤可施。士苟適道，修短可命。

臣聞因雲灑潤，則芬澤易流。乘風載響，則音徽自遠。是以德教俟物，而濟榮名。緣時而顯。

臣聞覽影偶質，不能解獨。指跡慕遠，無救於遲。是以循虛器者，非應物之具。翫空言者，非致治之機。

臣聞鑽燧吐火，以續暘谷之晷。揮翮生風，而繼飛廉之功。是以物有微而毗著，事有瑣而助洪。

臣聞春風朝煦，蕭艾蒙其溫。秋霜宵墜，芝蕙被其涼。是故威以齊物，為肅德以普濟。為弘。

臣聞巧盡於器，習數則貫。道繫於神，人亡則滅。是以輪匠肆目，不乏奚仲之妙。瞽叟清耳，而無伶倫之察。

臣聞性之所期，貴賤同量。理之所極，卑高一歸。是以淮月稟水，不能加涼。晞日引火，不必增輝。

臣聞絕節高唱，非凡耳所悲。肆義芳訊，非庸聽所善。是以南荆有寡和之歌，東野有不釋之辯。

臣聞尋煙染芬，薰息猶芳。徵音錄響，操終則絕。何則垂於世者，可繼。止乎身者，難結。是以玄晏之風，恒存動神之化。已滅。

臣聞託闇藏形，不為巧密。倚智隱情，不足自匿。是以重光發。

藻尋虛捕景大人貞觀探心昭武

臣聞披雲看霄則天文清澄風觀水則川流平是以四族放而唐劬二臣誅而楚寧

臣聞音以比耳爲美色以悅目爲歡是以衆聽所傾非假百里之操萬夫婉變非侯西子之顏故聖人隨世以擢佐明主因時而命官

臣聞出乎身者非假物所隆率乎時者非克已所勗是以利盡萬物不能蔽童昏之心德表生民不能救棲遑之辱

臣聞動循定檢天有可察應無常節身或難照是以望景揆日盈數可期撫臆論心有時而謬

臣聞傾耳求音眠優聽苦澄心徇物形逸神勞是以天殊其

數雖同方不能分其感理塞其通則並質不能共其休

臣聞遁世之士非受匏瓜之性幽居之女非無懷春之情是以名勝欲故偶影之操矜窮愈達故凌霄之節厲

臣聞聽極於音不慕鈞天之樂身足於蔭無假垂天之雲是以滿密之黎遺時雍之世豐沛之士忘桓撥之君

臣聞飛轡西頓則離朱與矇眊收察懸景東秀則夜光與珎珠匿耀是以才換世則俱困功偶時而並劬

臣聞示應於近遠有可察託驗於顯微或可包是以寸管下係天地不能以氣欺尺表逆立日月不能以形逃

臣聞絃有常音故曲終則改鏡無畜影故觸形則照是以虛已應物必究千變之容挾情適事不觀萬殊之妙

臣聞祝敵希聲以諧金石之和。擊鼓疎擊以節繁絃之契。是以經治必宣其通。圖物恒審其會。

臣聞目無嘗音之察。耳無照景之神。故在乎我者。不誅之於已。存乎物者。不求備於人。

臣聞放身而居。體逸則安。肆口而食。屬厭則充。是以王鮪登俎。不假吞波之魚。蘭膏停室。不思銜燭之龍。

臣聞衝波安流。則龍舟不能以漂。震風洞發。則夏屋有時而傾。何則。率乎動則靜凝。係乎靜則動貞。是以淫風大行。貞女蒙冶容之誨。淳化殷流。盜跖挾曾史之情。

臣聞達之所服。貴有或遺。窮之所接。賤而必尋。是以江漢之君。悲其墜屨。少原之婦。哭其亡簪。

臣聞觸非其類。雖疾弗應。感以其方。雖微則順。是以商飈漂山。不興盈尺之雲。谷風乘條。必降彌天之潤。故閭於治者。唱繁而和。寡審乎物者。力約而功峻。

臣聞煙出於火。非火之和。情生於性。非性之適。故火壯則煙微。性充則情約。是以殷墟有感物之悲。周京無佇立之跡。

臣聞適物之技。俯仰異用。應事之器。通塞異任。是以鳥棲雲而繳飛。魚藏淵而網沈。賁鼓密而含響。朗笛疎而吐音。

臣聞理之所守。勢所常奪。道之所閉。權所必開。是以生重於利。故據圖無揮劍之痛。義貴於身故臨川有投跡之哀。

臣聞通於變者。用約而利博。明其要者。器淺而應玄。是以天地之曠。該於六位。萬殊之曲。窮於五絃。

臣聞圖形於影未盡纖麗之容察火於灰不覩洪赫之烈是以問道存乎其人觀物必造其質

臣聞情見於物雖遠猶疎神藏於形雖近則密是以儀天步畧而修短可量臨淵挾水而淺深難察

臣聞虐暑熏天不減堅冰之寒涸陰凝地無累陵火之熱是以吞縱之彊不能反蹈海之志漂櫓之威不能降西山之節

臣聞理之所開力所常達數之所塞威有必窮是以烈火流金不能焚景沈寒凝海不能結風

臣聞足於性者天損不能入貞於期者時累不能淫是以迅風陵雨不謬晨禽之察勁陰殺節不凋寒木之心

箴類

女史箴

張華

茫茫造化二儀既分散氣流形既陶既甄在帝庖羲肇經天人爰始夫婦以及君臣家道以正而王猷有倫婦德尚柔含章貞吉婉嫕淑慎正位居室施衿結褵虔恭中饋肅慎爾儀式瞻清懿樊姬感莊不食鮮禽衛女矯桓耳忘和音志厲義高而二主易心玄熊攀檻馮媛趨進夫豈無畏知死不愆班妾有辭割驩同輦夫豈不懷防微慮遠道罔隆而不殺物無盛而不衰日中則昃月滿則微崇猶塵積替若駭機人咸知飾其容而莫知飾其性性之不飾或愆禮正斧之藻之克念作聖出其言善千里應之苟違斯義則同衾以疑出言如微而榮辱由茲勿謂幽昧靈監無象勿謂玄漠神聽無響無矜

爾榮天道惡盈無恃爾貴隆隆者墜鑒于小星戒彼攸遂比
心蝨斯則繁爾類驩不可以黷寵不可以專專實生慢愛極
則遷致盈必損理有固然美者自美翩以取尤冶容求好君
于所讐結恩而絕職此之由故曰翼翼矜矜福所以興靖恭
自思榮顯所期女史司箴敢告庶姬

封燕然山銘

班固

維永元元年秋七月有漢元舅曰車騎將軍竇憲寅亮聖皇
登翼王室納于大麓惟清緝熙乃與執金吾耿秉述職巡禦
治兵于朔方鷹揚之校螭虎之士爰該六師暨南單于東胡
烏桓西戎氐羌侯王君長之羣驍騎十萬元戎輕武長轂四
分雷輜蔽路萬有三千餘乘勒以八陣洩以威神玄甲耀日

朱旗絳天遂凌高闕下雞鹿經磧鹵絕大漠斬溫禺以釁鼓
血尸逐以染鏑然後四校橫徂星流彗掃蕭條萬里野無遺
寇於是域滅區殫反旆而旋考傳驗圖窮覽其山川遂踰涿
邪跨安侯乘燕然躡冒頓之區落焚老上之龍庭將上以攄
高文之宿憤光祖宗之玄靈下以安固後嗣恢拓境宇振大
漢之天聲茲可謂一勞而久逸暫費而永寧也乃遂封山刊
石昭銘盛德其辭曰

鑠王師兮征荒裔勦凶虐兮截海外復其邈兮且地界封神
丘兮建隆嶠熙帝載兮振萬世

座右銘

崔瑗

無道人之短無說己之長施人慎勿念受施慎勿忘世譽不

效選正文 卷之十一
足慕唯仁爲紀綱。隱心而後動。謗議庸何傷。無使名過實。守
愚聖所臧。在涅貴不緇。曖曖內含光。柔弱生之徒。老氏誠剛。
疆行行鄙夫。志悠悠。故難量。慎言節飲食。知足勝不祥。行之
苟有恒。久久自芬芳。

劔閣銘

張載

巖巖梁山。積石峩峩。遠屬荆衡。近綴岷嶓。南通邛夔。北達褒
斜。狹過彭碣。高踰嵩華。惟蜀之門。作固作鎮。是曰劔閣。壁立
千仞。窮地之險。極路之峻。世濁則逆。道清斯順。閉由往漢。開
自有晉。秦得百二。并吞諸侯。齊得十一。田生獻籌。矧茲狹隘。
土之外區。一人荷戟。萬夫赳赳。形勝之地。匪親勿居。昔在武
侯中流。而喜山河之固。見屈吳起。興實在德。險亦難恃。洞庭

孟門一國不祀。自古迄今。天命匪易。憑阻作昏。鮮不敗績。公
孫旣滅。劉氏銜璧。覆車之軌。無或重跡。勒銘山阿。敢告梁益。

石闕銘

陸倕

昔在舜格。文祖禹至。神宗周變。商俗湯黜。夏政雖革。命殊乎
因襲。揖讓異於干戈。而畧緯冥合。天人啓基。克明俊德。大庇
生民。其揆一也。在齊之季。昏虐君臨。威侮五行。怠棄三正。刑
酷然炭。暴踰膏柱。民怨神怒。衆叛親離。踏地無歸。瞻鳥靡託。
於是。我皇帝拯之。乃操斗極。把鈎陳翼。百神禔萬福。於是龍
飛黑水。虎步西河。雷動風驅。天行地止。命旅致屯。雲之應登。
壇有降火之祥。龜筮協從。人祗響附。穿曾露頂之豪。箕坐椎
髻之長。莫不援旗請奮。執銳爭先。夏首憑固。庸岷負阻。協彼

離心抗茲同德帝赫斯怒秣馬訓兵嚴鼓未通凶渠泥首弘
舸連軸巨艦接艦鐵馬千羣朱旗萬里折簡而禽廬九傳檄
以下湘羅兵不血刃士無遺鏃而樊鄧威懷巴黔底定於是
流湯之黨握炭之徒守似藩籬戰同枯朽革車近次師營商
牧華夷士女冠蓋相望扶老携幼一旦雲集壺漿塞野簞食
盈塗似夏民之附成湯殷士之窺周武安老懷少伐罪弔民
農不遷業市無易賈八方入計四輿奉圖羽檄交馳軍書狎
至一日二日非止萬機而尊嚴之度不聳於師旅淵默之容
無改於行陣計如投水思若轉規策定帷幄謀成几案曾未
浹辰獨夫授首乃焚其綺席棄彼寶衣歸琬臺之珠反諸侯
之玉指麾而四海隆平下車而天下大定拯茲塗炭救此橫

流功均天地明並日月於是仰協三靈俯從億兆受昭華之
玉納龍叙之圖類帝禋宗光有神器升中以祀羣望攝袂而
朝諸夏布教都畿班政方外謀協上策刑從中典南服緩耳
西羈反舌劔騎穹廬之國同川共穴之人莫不屈膝交臂厥
角稽顙鑿空萬里攘地千都幕南罷鄣河西無警於是治定
功成邇安遠肅忘茲鹿駭息此狼顧乃正六樂治五禮改章
程創法律置博士之職而著錄之生若雲開集雅之館而款
關之學如市興建庠序啓設郊丘一介之才必記無文之典
咸秩於是天下學士靡然向風人識廉隅家知禮讓教臻侍
子化洽期門區宇乂安方面靜息役休務簡歲阜民和歷代
規摹前王典故莫不斐夷翦截允執厥中以爲象闕之制其

來已遠。春秋設舊章之教。經禮垂布憲之文。戴記顯游觀之
言。周史書樹闕之夢。北荒明月。西極流精。海岳黃金。河庭紫
貝。蒼龍玄武之制。銅爵鐵鳳之工。或以聽窮。省寃。或以布治。
懸法。或以表正。王居或以光崇。帝里晉氏。浸弱宋歷。威夷禮
經。舊典寂寥。無記鴻規。盛烈湮沒。罕稱乃假。天闕於牛頭。託
遠圖於博望。有欺耳目。無補憲章。乃命審曲之官。選明中之
士。陳圭置臬。瞻星揆地。興復表門。草創華闕。於是歲次天紀。
月旅太簇。皇帝御天下之七載也。構茲盛則。興此崇禮。方且
趨以表敬。觀而知法。物覩雙碣之容。人識百重之典。作範垂
訓。赫矣壯乎。爰命下臣。式銘盤石。其辭曰。惟帝建國。正位辨
方。周營洛涘。漢啓岐梁。居因業盛。文以化光。爰有象闕。是惟
舊章。青蓋南洎。黃旗東指。懸法無聞。藏書弗紀。大人造物。龍
德休否。建此百常。興茲雙起。偉哉偃蹇。壯矣巍巍。旁映重疊。
上連翠微。布教方顯。浹日初輝。懸書有附。委篋知歸。鬱崑重
軒。穹隆反宇。形聳飛棟。勢超浮柱。色法上圓。制模下矩。周望
原隰。俛臨煙雨。前賓四會。却背九房。北通二轍。南湊五方。暑
來寒往。地久天長。神哉華觀。永配無疆。

新漏刻銘

陸倕

夫自天觀象。昏旦之刻未分。治歷明時。盈縮之度無准。挈壺
命氏。遠哉義用。揆景測辰。徵宮戒井。守以水火。分茲日夜。而
司曆亡官。疇人廢業。孟陬殄滅。攝提無紀。衛宏載傳。呼之節
較。而未詳。霍融叙分至之差。詳而不密。陸機之賦。虛握靈珠。

孫綽之銘。空擅崑玉。弘度遺篇。承天垂旨。布在方冊。無彰器用。譬彼春華。同夫海棗。寧可以執物字。民作範。垂訓者乎。且今之官漏。出自會稽。積水違方。導流垂則。六日無辨。五行不分。歲躔闔茂。月次姑洗。皇帝有天下之五載也。樂遷夏諺。禮變商俗。業類補天。功均柱地。河海夷晏。風雲律呂。坐朝晏罷。每旦晨興。屬傳漏之音。聽雞人之響。以爲星火。謬中金水。違用時乖。啓閉箭異。錙銖爰命。日官草創。新器於是。俯察旁羅。登臺升庫。則干地四參。以天一建武遺蠹。咸和餘舛。金筒方圓之制。飛流吐納之規。變律改經。一皆懲革。天監六年。太歲丁亥。十月丁亥朔。十六日壬寅。漏成進御。以考辰正。晷測表候。陰不謬圭。撮無乖黍。累又可以校運算之聯合。辨分天之

邪正。察四氣之盈虛。課六歷之疎密。示世貽則。傳之無窮。赫矣煥乎。無德而稱也。昔嘉量微物。盤盂小器。猶其昭德記功。載在銘典。况入神之制。與造化合符。成物之能。與坤元等契。勲倍楹席。事百巾机。寧可使多謝曾水。有陋昆吾。金字不傳。銀書未勒者哉。乃詔小臣爲其銘曰。

一暑一寒。有明有晦。神道無跡。天工罕代。乃置挈壺。是惟熙載。氣均衡石。啓正權槩。世道交喪。禮術銷亡。遽遷水火。爭倒衣裳。擊刀舛次。叢木乖方。爰究爰度。時惟我皇。方壺外次。圓流內襲。洪殺殊等。高卑異級。靈虬承注。陰蟲吐喻。倏往忽來。鬼出神入。微若抽繭。逝如激電。耳不輟音。眼無留眴。銅史司刻。金徒抱箭。履薄非兢。臨深罔戰。授受靡訛。登降弗爽。唯精

唯。一。可。法。可。象。月。不。知。來。日。無。藏。在。分。似。符。契。至。猶。影。響。合。
昏。暮。卷。黃。英。長。生。尚。辨。天。意。猶。測。地。情。况。我。神。造。通。幽。洞。靈。
配。皇。等。極。爲。世。作。程。

誄類

王仲宣誄并序

曹植

建安二十二年正月二十四日戊申。魏故侍中關內侯王君
卒。嗚呼哀哉。皇穹神察。詰人是恃。如何靈祇。殲我吉士。誰謂
不痛。早世卽冥。誰謂不傷。華繁中零。存亡分流。天遂同期。朝
聞夕沒。先民所思。何用誄德。表之素旗。何以贈終。哀以送之。
遂作誄曰。猗歟侍中。遠祖彌芳。公高建業。佐武伐商。爵同齊
魯。邦祀絕亡。流裔畢萬。勲績惟光。晉獻賜封。于魏之疆。天開

之祚。末胄稱王。厥姓斯氏。條分葉散。世滋芳烈。揚聲秦漢。會
遭陽九。炎光中曠。世祖撥亂。爰建時雍。三台樹位。履道是鍾。
寵爵之加。匪惠惟恭。自君一祖。爲光爲龍。僉曰休哉。宜翼漢
邦。或統太尉。或掌司空。百揆惟敘。五典克從。天靜人和。皇教
遐通。伊君顯考。弈葉佐時。入管機密。朝政以治。出臨朝岱。庶
績咸熙。君以淑懿。繼此洪基。既有令德。材技廣宣。彊記洽聞。
幽讚微言。文若春華。思若涌泉。發言可詠。下筆成篇。何道不
洽。何藝不開。棋局逞巧。博奕惟賢。皇家不造。京室隕顛。宰臣
專制。帝用西遷。君乃羈旅。離此阻艱。翕然鳳舉。遠竄荆蠻。身
窮志達。居鄙行鮮。振冠南嶽。濯纓清川。潛處蓬室。不干勢權。
我公奮鉞。耀威南楚。荆人或違。陳戎講武。君乃義發。算我師

旅高尚霸功。投身帝宇。斯言既發。謀夫是與。是與伊何。響我明德。投戈編郡。稽顙漢北。我公定嘉。表揚京國。金龜紫綬。以彰勲則。勲則伊何。勞謙靡已。憂世忘家。殊略卓峙。乃署祭酒。與軍行止。算無遺策。畫無失理。我王建国。百司儻又。君以顯舉。秉機省闈。戴蟬珥貂。朱衣皓帶。入侍帷幄。出擁華蓋。榮耀當世。芳風掩藹。嗟彼東夷。憑江阻湖。騷擾邊境。勞我師徒。光光戎輅。霆駭風徂。君侍華轂。輝耀王塗。思榮懷附。望彼來威。如何不濟。運極命衰。寢疾彌留。吉往凶歸。嗚呼哀哉。翩翩孤嗣。號慟崩摧。發軔北魏。遠迄南淮。經歷山河。泣涕如頽。哀風興感。行雲徘徊。游魚失浪。歸鳥忘栖。嗚呼哀哉。吾與夫子。義貫丹青。好和琴瑟。分過友生。庶幾遐年。攜手同征。如何奄忽。

棄我夙零。感昔宴會。志各高厲。予戲夫子。金石難敵。人命靡常。吉凶異制。此驩之人。孰先隕越。何寤夫子。果乃先逝。又論死生。存亡數度。子猶懷疑。求之明據。儻獨有靈。游魂秦素。我將假翼。飄飄高舉。超登景雲。要子天路。喪柩既臻。將反魏京。靈輜迴軌。白驥悲鳴。虛廓無見。藏景蔽形。孰云仲宣。不聞其聲。延首歎息。再泣交頸。嗟乎夫子。永安幽冥。人誰不沒。達士徇名。生榮死哀。亦孔之榮。嗚呼哀哉。

楊荊州誄并序

潘岳

維咸寧元年。夏四月乙丑。晉故折衝將軍荊州刺史東武戴侯榮陽楊使君薨。嗚呼哀哉。夫天子建国。諸侯立家。選賢與能。政是以和。周賴尚父。殷憑太阿。矯矯楊侯。晉之爪牙。忠節

克明茂績惟嘉將宏王畧肅清荒遐降年不永玄首未華銜
恨沒世命也奈何嗚呼哀哉自古在昔有生必死身沒名垂
先哲所遵行以號彰德以述美敢託旒旗爰作斯誄其辭曰
邈矣遠祖系自有周昭穆繁昌枝庶分流族始伯喬氏出楊
侯奕世丕顯允迪大猷天厭漢德龍戰未分伊君祖考方事
之殷鳥則擇木臣亦簡君投心外朝策名委身奮躍淵塗跨
騰風雲或統驍騎或據領軍篤生戴侯茂德繼期纂戎洪緒
克構堂基弱冠味道無競惟時孝實蒸蒸友亦怡怡多才豐
藝彊記洽聞目盼毫末心算無垠卓隸兼善尺牘必珍足不
輟行手不釋文翰動若飛紙落如雲學優則仕乃從王政散
璞發輝臨軒作令化行邑里惠洽百姓越登司官肅我朝命

惟此大理國之憲章君蒞其任視民如傷庶獄明慎刑辟端
詳聽參臯呂稱侔于張改授農政于彼野王倉盈庾億國富
兵疆煌煌文后鴻漸晉室君以兼資參戎作弼用錫土宇膺
茲顯秩青社白茅亦朱其紱魏氏順天聖皇受終烈烈楊侯
實統禁戎司管閭闔清我帝宮苛慝不作穆如和風謂督勳
勞班命彌崇茫茫海岱玄化未周滔滔江漢疆場分流秉文
兼武時惟楊侯旣守東莞乃牧荊州折衝萬里對揚王休聞
善若驚疾惡如讐示威示德以伐以柔吳夷凶侈僞師畏逼
將乘讐釁席卷南極繼襄糧盡神謀不忒君子之過引曲推
直如彼日月有時則食負執其咎功讓其力亦旣旋旆爲法
受黜退守丘塋杜門不出游目典墳縱心儒術祗祗搢紳升

堂入室靡事不咨無疑不質位貶道行身窮志逸弗慮弗圖
乃寢乃疾昊天不弔景命其卒嗚呼哀哉子囊佐楚遺言城
郢史魚諫衛以尸顯政伊君臨終不忘忠敬寢伏牀蓐念在
朝廷朝達厥辭夕隕其命聖王嗟悼寵贈衾綈誄德策勳考
終定謚羣辟慟懷邦族揮淚孤嗣在疚寮屬含悴赴者同哀
路人增欷嗚呼哀哉余以頑蔽覆露重陰仰追先考執友之
心俯感知已識達之深承諱切怛涕淚霑襟豈忘載奔憂病
是沈在疾不省於亡不臨舉聲增慟哀有餘音嗚呼哀哉

楊仲武誄

并序

潘岳

楊經字仲武滎陽宛陵人也中領軍肅侯之曾孫荊州刺史
戴侯之孫東武康侯之子也八歲喪父其母鄭氏光祿勳密

陵成侯之元女操行甚高血養幼孤以保父夫家而免諸艱
難戴侯康侯多所論著又善草隸之藝子以妙年之秀固能
綜覽義旨而軌式模範矣雖舅氏隆盛而孤貧守約心安陋
巷體服菲薄余甚奇之若乃清才儁茂盛德日新吾見其進
未見其已也既籍三葉世親之恩而子之姑余之伉儷焉往
歲卒於德宮里喪服周次綱繆累月苟人必有心此亦款誠
之至也不幸短命春秋二十九元康九年夏五月己亥卒嗚
呼哀哉乃作誄曰

伊子之先奕葉熙隆惟祖惟曾載揚休風顯考康侯無祿早
終名器雖光勲業未融篤生吾子誕茂淑姿克岐克嶷知章
知微鉤深探曠味道研幾匪直也人邦家之輝子之邁閔曾

未齒髻如彼危根當此衝。德之休明靡幽不喬。弱冠流芳
儁聲清劭。爾舅惟榮。爾宗惟粹。勿秉殊操。違豐安匱。撰錄先
訓。俾無隕墜。舊文新藝。罔不必肄。潘楊之穆。有自來矣。矧乃
今日。慎終如始。爾休爾戚。如實在已。視予猶父。不得猶子。敬
亦既篤。愛亦既深。雖殊其年。實同厥心。日昃景西。望子朝陰。
如何短折。折背世湮。沈嗚呼哀哉。寢疾彌留。守茲孝友。臨命忘
身。顧戀慈母。哀哀慈母。痛心疾首。嗷嗷同生。悽悽諸舅。春蘭
擢莖。方茂其華。荆寶挺璞。將剖于和。含芳委耀。毀璧摧柯。嗚
呼仲武。痛哉奈何。德宮之艱。同次外寢。惟我與爾。對筵接枕。
自時迄今。曾未盈稔。姑姪繼隕。何痛斯甚。嗚呼哀哉。披帙散
書。屢覩遺文。有造有寫。或草或真。執玩周復。想見其人。紙勞

于手。涕霑于巾。龜筮既襲。塋隧既開。痛矣楊子。與世長乖。朝
濟洛川。夕次山隈。歸鳥頡頏。行雲徘徊。臨穴永訣。撫視盡哀。
遺形莫紹。增慟余懷。魂兮往矣。梁木實摧。嗚呼哀哉。

夏侯常侍誄

潘岳

夏侯湛字孝若。譙國譙人也。少知名。弱冠辟太尉府掾。賢良
方正。徵爲太子舍人尚書郎。野王令中書郎南陽相家艱。乞
還頃之。選爲太子僕。未就命而世祖崩。天子以爲散騎常侍。
從班列也。春秋四十有九。元康元年夏五月壬辰。寢疾卒于
延喜里第。嗚呼哀哉。乃作誄曰。

禹錫玄珪。實曰文命。克明克聖。光啓夏政。其在于漢。邁勳惟
嬰。思弘儒業。小大雙名。顯祖曜德。牧兗及荆。父守淮岱。治亦

有聲。英英夫子灼灼其雋。飛辯摘藻華繁。玉振如彼。隋和發
彩流潤。如彼錦績。列素點絢。人見其表。莫測其裏。徒謂吾生
文勝。則史心照。神交唯我。與子且歷。少長逮觀。終始子之承
親孝齊。閑參子之友悌。和如瑟琴。事君直道。與朋信心。雖實
唱高。猶賞爾音。弱冠厲翼。羽儀初升。公可旣招。皇輿乃徵。內
贊兩宮。外宰黎蒸。忠節允著。清風載興。泱彼樂都。寵于惟王。
設官建輔。妙簡邦良。用取喉舌。相爾南陽。惠訓不倦。視人如
傷。乃眷北顧。辭祿延喜。余亦偃息。無事明時。疇昔之游。一紀
于茲。斑白攜手。何歡如之。居吾語女。衆實勝寡。人惡雋異。俗
疵文雅。執戟疲揚。長沙投賈。無謂爾高。恥居物下。子乃洗然
變色。易容慨然。歎曰。道固不同。爲仁由已。匪我求蒙。誰毀誰

譽。何去何從。莫涅匪緇。莫磨匪磷。子獨正色。居屈志申。雖不
爾以。猶致其身。獻替盡規。媚茲一人。讜言忠謀。世祖是嘉。將
僕儲皇。奉轡承華。先朝末命。聖列顯加。入侍帝闈。出光厥家。
我聞積善。神降之吉。宜享遐紀。長保天秩。如何斯人。而有斯
疾。曾未知命。中年隕卒。嗚呼哀哉。惟爾之存。匪爵而貴。其食
美服。重珍兼味。臨終遺誓。永錫爾類。歛以時襲。殯不簡器。誰
能拔俗。生盡其養。孰是養生。而薄其葬。淵哉若人。縱心條暢。
傑操明達。困而彌亮。格既祖容。體長歸存。亡永訣逝者。不
追望子。舊車覽爾。遺衣悃抑。失聲迸涕。交揮非子。爲慟吾慟。
爲誰嗚呼。哀哉。日往月來。暑退寒襲。零露霑凝。勁風淒急。慘
爾其傷。念我良執。適子素館。撫孤相泣。前思未弭。後感仍集。

積悲滿懷逝矣安及嗚呼哀哉

馬汧督誄并序

潘岳

惟元康七年秋九月十五日晉故督守關中侯扶風馬君卒
嗚呼哀哉初雍部之內屬羗反未弭而編戶之氏又肆逆焉
雖王旅致討終於殄滅而蜂蠆有毒驟失小利俾百姓流亡
頻於塗炭建威喪元於好時州伯宵遯乎大谿若夫偏師裨
將之隕首覆軍者蓋以十數剖符專城紆青拖墨之司奔走
失其守者相望於境秦隴之僭鞏更爲魁旣已襲汧而館其
縣子以眇爾之身介乎重圍之裏率寡弱之衆據十雉之城
羣氏如蝟毛而起四面雨射城中城中鑿穴而處負戶而汲
木石將盡樵蘇乏竭芻蕘罄絕於是乎發梁棟而用之罽以

鐵鎖機關旣縱禍而又升焉爨陳焦之麥栝栢梢之松用能
薪芻不匱人畜取給青煙傍起歷馬長鳴凶醜駭而疑懼乃
闕地而攻子命穴浚塹寘壺鋪瓶甌以偵之將穿城響作因
焚積火薰之潛氏殲焉久之安西之救至竟免虎口之厄全
數百萬石之積文契書於幕府聖朝疇咨進以顯秩殊以幢
蓋之制而州之有司乃以私隸數口穀數十斛考訊吏兵以
擯楚之辭連之大將軍屢抗其疏曰敦固守孤城獨當羣寇
以少禦衆載離寒暑臨危奮節保穀全城而雍州從事忌敦
勲效推極小疵非所以褒獎元功宜解敦禁劾假授詔書遽
許而子固已下獄發憤而卒也朝廷聞而傷之策書曰皇帝
咨故督守關中侯馬敦忠勇果毅率勵有方固守孤城危逼

獲濟寵秩未加不幸喪亡朕用悼焉今追贈牙門將軍印綬
祠以少牢魂而有靈嘉茲寵榮然繫士之聞穢其庸致思乎
若乃下吏之肆其噤害則皆妬之徒也嗟乎妬之欺善抑亦
賢首之讐也語曰或戒其子慎無爲善言固可以若是悲夫
昔乘丘之戰縣賁父御魯莊公馬驚敗績賁父曰他日未嘗
敗績而今敗績是無勇也遂死之國人浴馬有流矢在白肉
公曰非其罪也乃誅之漢明帝時有司馬叔持者白日於都
市手劔父讐視死如歸亦命史臣班固而爲之誄然則忠孝
義烈之流慷慨非命而死者綴辭之士未之或遺也天子旣
已策而贈之微臣託乎舊史之末敢闕其文哉乃作誄曰知
人未易人未易知嗟茲馬生位未名卑西戎猾夏乃奮其奇

保此汧城救我邊危彼邊奚危城小粟富子以眇身而裁其
守兵無加衛墉不增築焚焚羣狄豺虎競逐鞞更恣睢潛踣
官寺齊萬虓闕震驚台司聲勢沸騰種落煽熾旌旗電舒戈
矛林植彤珠星流飛矢雨集惴惴士女號天以泣爨麥而炊
負戶以汲累卵之危倒懸之急馬生爰發在險彌克精貫白
日猛烈秋霜稜威可厲懦夫克壯霑恩撫循寒士挾纊蠶蠶
犬羊阻衆陵寡潛隧密攻九地之下愜愜窮城氣苦無假昔
命懸天今也惟馬惟此馬生才博智瞻偵以瓶壺司以長漣
鋪未見鋒火以起焜薰尸滿窟培穴以斂木石匱竭其稗空
虛矚然馬生傲若有餘刃梁爲礮柝松爲芻守不乏械櫜有
鳴駒哀哀建威身伏斧質悠悠烈將覆軍喪器戎釋我徒顯

誅我師以生易死。疇克不一聖朝。西顧關右。震惶分我。汧庾
化爲寇糧。實賴夫子思。暮彌長。咸使有勇。致命知方。我雖未
學。聞之前典。十世宥能。表墓旌善。思人愛樹。甘棠勿翦。矧乃
吾子。功深疑淺。兩造未具。儲禁蓋。孰是勲庸。而不獲免。猶
哉。部司其心。反側斷善。害能醜。正惡直。牧人逶迤。自公退食。
聞穢鷹揚。會不戢翼。忘爾大勞。猜爾小利。苟莫開懷。下何不
至。慨慨馬生。碩碩高致。發憤因固。沒而猶眠。嗚呼哀哉。安平
出奇破齊。克完張孟運。籌危趙獲。安汧人賴。子猶彼談。單如
何。吝嫉。搖之筆端。傾舍可賞。矧云私粟。狄隸可頌。况曰家僕。
剔子雙龜。貫以三木。功存汧城。身死汧獄。凡爾同圍。心焉摧
割。扶老攜幼。街號巷哭。嗚呼哀哉。明明天子。旌以殊恩。光光
呼哀哉。

陽給事誄并序

顏延之

寵贈乃牙其門。司勳班爵。亦兆後昆。死而有靈。庶慰冤魂。嗚
呼哀哉。

惟永初二年十一月十一日。宋故寧遠司馬濮陽太守彭城
陽君卒。嗚呼哀哉。瓚少稟志節。資性忠果。奉上以誠。率下有
方。朝嘉其能。故授以邊事。永初之末。佐守滑臺。值國禍薦臻。
王略中否。獯虜間。釁剝司寇。幽并騎駑。屯逼鞏洛。列營緣
戍。相望屠潰。瓚奮其猛銳。志不違難。立乎將率之間。以緝華
裔之衆。罷困相保。堅守四旬。上下力屈。受陷勅寇。士師奔擾。
棄軍爭免。而瓚誓命沈城。佻身飛鏃。兵盡器竭。斃于旗下。非
夫貞壯之氣。勇烈之志。豈能臨敵引義。以死殉節者哉。景平

之元朝廷聞而傷之有詔曰故寧遠司馬濮陽太守陽瓚滑
臺之逼厲城固守投命殉節在危無撓古之烈士無以加之
可贈給事中振卹遺孤以慰存亡追寵旣彰人知慕節河汴
之間有義風矣逮元嘉廓祚聖神紀物光昭茂緒旌錄舊勲
苟有槩於貞孝者實事感於仁明末臣蒙固側聞至訓敢詢
諸前典而爲之誄其辭曰

貞不常祐義有必甄處父勤君怨在登賢苦夷致果題子行
間忠壯之烈宜自爾先舊勲雖廢邑氏遂傳惟邑及氏自溫
徂陽狐續旣降晉族弗昌之子之生立績宋皇拳猛沈毅溫
敏肅良如彼竹柏負雪懷霜如彼駢駟配服駉衡邊兵喪律
王略未恢函陝堙阻瀝洛蒿萊朔馬東驚胡風南埃路無歸

轉野有委骸帝圖斯艱簡兵授才定命陽子佐師危臺憬彼
危臺在滑之圻周衛是交鄭翟是爭昔惟萃國今實邊亭憑
噉結關負河縈城金柝夜擊和門晝扃料敵厭難時惟陽生
涼冬氣勁塞外草衰邊矣獯虜乘障犯威鳴驥橫厲霜鏑高
輦軼我河縣俘我洛畿攢鋒成林投鞍爲圍翳翳窮壘嗷嗷
羣悲師老變形地孤援闕卒無半菽馬實拊秣守未焚衝攻
已濡褐烈烈陽子在困彌達勉慰痍傷拊巡饑渴力雖可窮
氣不可奪義立邊疆身終鋒枯嗚呼哀哉貴父隕節魯人是
志汧督效貞晉策攸記皇上嘉悼思存寵異于以贈之言登
給事疏爵紀庸恤孤表嗣嗟爾義士沒有餘喜嗚呼哀哉

陶徵士誄并序

顏延之

夫璿玉致美。不爲池隍之寶。桂椒信芳。而非園林之實。豈期深而好遠哉。蓋云殊性而已。故無足而至者。物之藉也。隨踵而立者。人之薄也。若乃巢高之抗行。夷皓之峻節。故已父老。堯禹錙銖。周漢而綿世。浸遠光靈。不屬至使菁華隱沒。芳流歇絕。不其惜乎。雖今之作者。人自爲量。而首路同塵。輟塗殊軌者多矣。豈所以昭末景。泛餘波。有晉徵士尋陽陶淵明。南岳之幽居者也。弱不好弄。長實素心。學非稱師。文取指達。在衆不失其寡。處言逾見其默。少而貧病。居無僕妾。井臼弗任。藜藿不給。母老子幼。就養勤匱。遠惟田生致親之議。追悟毛子捧檄之懷。初辭州府。三命後爲彭澤令。道不偶物。棄官從好。遂乃解體。世紛結。志區外。定跡深棲。於是乎遠。灌畦鬻蔬。

爲供魚菽之祭。織紉緯蕭以充糧粒之費。心好異書。性樂酒德。簡棄煩促。成就省曠。殆所謂國爵屏貴。家人忘貧者歟。有詔徵著作。郎稱疾不到。春秋若干元嘉四年月日。卒于尋陽縣之某里。近識悲悼。遠士傷情。冥默福應。嗚呼淑貞。夫實以誄華名。由謚高苟。允德義貴賤何算焉。若其寬樂令終之美。好廉克已之操。有合謚典。無愆前志。故詢諸友好。宜謚曰靖節。徵士其辭曰。

物尚特生。人固介立。豈伊時邁。曷云世及。嗟乎若士。望古遙集。韜此洪族。茂彼名級。睦親之行。至自非敦。然諾之信。重於布言。廉深簡潔。貞夷粹溫。和而能峻。博而不繁。依世尚同。詭時則異。有一於此。兩非默置。豈若夫子。因心違事。畏榮好古。

薄身厚志世霸虛禮州壤推風孝惟義養道必懷邦人之秉
彝不隘不恭爵同下士祿等上農度量難鈞進退可限長卿
棄官稚賓自免子之悟之何悟之辨賦詩歸來高蹈獨善亦
既超曠無適非心汲流舊巖葺宇家林晨煙暮靄春煦秋陰
陳書輟卷置酒絃琴居備勤儉躬兼貧病人否其憂子然其
命隱約就閑遷延辭聘非直也明是惟道性糾纏幹流冥漠
報施孰云與仁實疑明智謂天蓋高胡謬斯義履信曷憑思
順何寘年在中身疾維疴疾視死如歸臨凶若吉藥劑弗嘗
禱祀非恤僚幽告終懷和長畢嗚呼哀哉敬述靖節式曾遺
占存不願豐沒無求瞻省計却賻輕哀薄歛遭壤以穿旋葬
而窆嗚呼哀哉深心追往遠情逐化自爾介居及我多暇伊
好之洽接閭隣舍宵盤畫懋非舟非駕念昔宴私舉觴相誨
獨正者危至方則閱哲人卷舒布在前載取鑒不遠吾規子
佩爾實愀然中言而發違象速尤迂風先蹙身才非實榮聲
有歇獻音永矣誰箴余闕嗚呼哀哉仁焉而終智焉而鑿黔
婁既沒展禽亦逝其在先生同塵徃世旌此靖節加彼康惠
嗚呼哀哉

宋孝武宣貴妃誄 并序

謝莊

惟大明六年夏四月壬子宣貴妃薨律谷罷煖龍鄉輟曉照
車去魏連城辭趙皇帝痛掖殿之既闋悼泉途之已宮巡步
擔而臨蕙路集重陽而望椒風嗚呼哀哉天寵方隆王姬下
姻肅雍換景陟此爰臻國軫喪淑之傷家疑實庇之怨敢撰

德於旂旒庶圖芳於鐘萬其辭曰

玄丘煙熅瑤臺降芬高唐滌雨巫山鬱雲誕發蘭儀光啓玉
慶望月方娥瞻星比婺毓德素里棲景宸軒處麗絺絡出愁
蘋蘩修詩賁道稱圖照言翼訓奴幄贊軌堯門綢繆史館容
與經闡陳風緝藻臨彖分微游藝殫數撫律窮機躊躇冬愛
怊悵秋暉展如之華寔邦之媛敬懃顯陽肅恭崇憲奉榮維
約承慈以遜逮下延和臨朋違怨祚靈集祀慶藹迎祥皇胤
璿式帝女金相聯跗齊頡接萼均芳以藩以牧燭代揮梁視
朔書氣觀臺告侵八頌尙和六祈輟滲衡總滅容翬翟毀社
掩綵瑤光收萃紫禁嗚呼哀哉惟軒夕改駟輅晨遷離宮天
邃別殿雲懸靈衣虛襲組帳空煙巾見餘軸匣有遺絃嗚呼

哀哉移氣朔兮變羅紉白露凝兮歲將闌庭樹驚兮中帷響
金缸暖兮玉座寒純孝擗其俱毀共氣摧其同樂仰昊天
之莫報怨凱風之徒攀茫昧與善寂寥餘慶喪過于哀棘實滅
性世覆冲華國虛淵令嗚呼哀哉題湊旣肅龜筮旣辰階撤
兩奠庭引雙轡維慕維愛曰子曰身慟皇情於客物崩列辟
於上旻崇徽章而出寰甸照殊策而去城闕嗚呼哀哉經建
春而右轉循閭闔而逕渡旌委鬱於飛飛龍逶遲於步步銷
楚挽於槐風喝邊簫於松霧涉姑繇而環迴望樂池而顧慕
嗚呼哀哉晨輶解鳳曉蓋俄金山庭寢日隧路抽陰重扃
閔兮燈已黯中泉寂兮此夜深銷神躬于壤未散靈臯於天
濤響乘氣兮蘭馭風德有遠兮聲無窮嗚呼哀哉

哀類

哀永逝文

潘岳

啓夕兮宵興。悲絕緒兮莫承。俄龍輻兮門側。嗟俟時兮將升。
 嫂姪兮悼惶。慈姑兮垂矜。聞鳴雞兮戒朝。咸驚號兮撫膺。逝
 日長兮生年淺。憂患衆兮歡樂尠。彼延思兮離居。歎河廣兮
 未遠。今奈何兮一舉。邈終天兮不反。盡余哀兮祖之晨。揚明
 燎兮接靈輻。撤房帷兮席庭筵。舉酌觴兮告永遷。悽切兮增
 歎。俯仰兮揮淚。想孤魂兮眷舊宇。視倏忽兮若鬢。鬢徒鬢
 今在慮。靡耳目兮一遇。停駕兮淹留。徘徊兮故處。周求兮何
 獲。引身兮當去。去去華輦兮初邁。馬廻首兮旋旆。風泠泠兮入
 帷。雲霏霏兮承蓋。鳥倦翼兮忘林。魚仰沫兮失瀨。悵悵兮遲

遲。遵吉路兮凶歸。思其人兮已滅。覽餘跡兮未夷。昔同途兮
 今異世。憶舊歡兮增新悲。謂原隰兮無畔。謂川流兮無岸。望
 山兮寥廓。臨水兮浩汗。視天日兮蒼茫。面邑里兮蕭散。匪外
 物兮或改。固歡哀兮情換。嗟潛隧兮既敞。將送形兮長往。委
 蘭房兮繁華。襲窮泉兮朽壤。中慕叫兮擗標。之子降兮宅兆。
 撫靈輻兮訣幽房。棺冥冥兮地窈窕。戶闔兮燈滅。夜何時兮
 復曉。歸反哭兮殯宮。聲有止兮哀無終。是非乎。何遲。越一
 遇兮日中。既遇日兮無兆。曾寤寐兮弗夢。既顧瞻兮家道長。
 寄心兮爾躬。重曰。已矣。此蓋新哀之情。然耳。渠懷之。其幾何。
 庶無愧兮莊子。

宋文皇帝元皇后哀策文 并序

顏延之

惟元嘉十七年七月二十六日大行皇后崩于顯陽殿。粵九月二十七日將遷座于長寧陵禮也。龍輅纏紵。容翟結駟。皇塗昭列。神路幽嚴。皇帝親臨。祖饋躬瞻。宵載節遺。儀於組旒。淪徂音乎珩珮。悲黼筵之移御。痛輦祿之重晦。降輿客位。撤奠殯階。乃命史臣。累德述懷。其辭曰。

倫昭儷升。有物有憑。圓精初爍。方祗始凝。昭哉世族。祥發慶膺。祕儀景胃。圖光玉繩。昌輝在陰。柔明將進。率禮蹈和。稱詩納順。爰自待年。金聲夙振。亦既有行。素章增絢。象服是加。言觀維則。俾我王風。始基嬪德。惠問川流。芳猷淵塞。方江泳漢。載誥南國。伊昔不造。鴻化中微。用集寶命。仰陟天機。釋位公宮。登曜紫闈。欽若皇姑。允迪前徽。孝達寧親。敬行宗祀。進思

才淑傍綜。圖史發音。在詠動容。成紀壺政。穆宣房樂。韶理坤則。順成星軒。潤飾德之所屆。惟深必測。下飾震騰。上清眺側。有來斯雍。無思不極。謂道輔仁。可化莫踈。象物方臻。賦禘告診。太和既融。收華委世。蘭殿長陰。椒塗弛衛。嗚呼哀哉。戒涼在肆。杪秋卽交。霜夜流唱。曉月升魄。八神警引。五輅遷跡。噉噉儲嗣。哀哀列辟。灑零玉墀。雨泗丹掖。撫存悼亡。感今懷昔。嗚呼哀哉。南背國門。北首山園。僕人按節。服馬顧轂。造酸紫蓋。眇泣素軒。滅綵清都。夷體壽原。邑野淪藹。戎夏悲謹。來芳可述。往駕弗援。嗚呼哀哉。

齊敬皇后哀策文 并序

謝朓

惟永泰元年秋九月朔日。敬皇后梓宮啓。自先塋將祔于某

陵。其日至，尊親奉奠。其皇帝乃使兼太尉某設祖於行宮。禮也。翠帟舒，阜玄堂啓扉，俎撤三獻，筵卷六衣。哀子嗣皇帝懷履衛而延首，想鸞輅而撫心痛，椒塗之先廓，哀長信之莫臨。身隔兩赴，時無一展。旋詔左言，光敷聖善。其辭曰：

帝唐遠，曾御龍遙。緒在秦作，劉在漢開。楚肇惟淑聖，克永克令。清漢表靈，曾沙膺慶。爰定厥祥，德音允穆。光華沼沚，榮驪中谷。敬始紘緼，教先種稷。睿問川流，神襟蘭郁。先德韜光，君道方被。于佐求賢，所謁無訛。顧史弘式，陳詩展義。厚下曰仁，藏往伊智。十亂斯俟，四教因忒。思媚諸姑，貽我嬪則。化自公宮，遠被南國。軒輻懷光，素舒佇德。閔予不祐，慈訓早違。方年冲藐，懷袖靡依。家臻寶業，身嗣昌輝。壽宮寂遠，清廟虛歸。嗚

呼哀哉。帝遷明命，民神胥悅。乾景外臨，陰儀內缺。空悲故劍，徒羨金穴。璋瓚奚獻，禕褕罔設。嗚呼哀哉，馮相告，稷宸駕長往。貽厥遠圖，末命是獎。懷豐沛之綢繆兮，背神京之弘敞。陋蒼梧之不從兮，遵鮒隅以同壤。嗚呼哀哉，陳象設於園寢兮，耿輿鏐於松楸。望承明而不入兮，度清洛而南游。繼池緯於通軌兮，接龍帷於造舟。廻塘寂其已暮兮，東川澹而不流。嗚呼哀哉，藉闕宮之遠烈兮，聞續女之遐慶。始協德於蘋蘩兮，終配祀而表命。慕方纒於賜衣兮，哀日隆於撫鏡。思寒泉之罔極兮，託彤管於遺詠。嗚呼哀哉。

碑文類

郭有道碑文 并序

蔡邕

先生諱泰字林宗太原界休人也其先出自有周王季之穆有號叔者寔有懿德文王咨焉建國命氏或謂之郭卽其後也先生誕應天衷聰睿明哲孝友溫恭仁篤慈惠夫其器量弘深姿度廣人浩浩焉汪汪焉奧乎不可測已若乃砥節厲行直道正辭貞固足以幹事隱括足以矯時遂考覽六經探綜圖緯周流華夏隨集帝學收文武之將墜拯微言之未絕于時纓綬之徒紳珮之士望形表而影附聆嘉聲而響和者猶百川之歸巨海鱗介之宗龜龍也爾乃潛隱衡門收朋勸誨童蒙賴焉用祗其蔽州郡聞德虛已備禮莫之能致羣公休之遂辟司徒掾又舉有道皆以疾辭將蹈鴻涯之遐跡紹巢許之絕軌翔區外以舒翼超天衢以高峙稟命不融享年

四十有二以建寧二年正月乙亥卒凡我四方同好之人永懷哀悼靡所寘念乃相與惟先生之德以謀不朽之事僉以爲先民旣沒而德音猶存者亦賴之於見述也今其如何而闕斯禮於是樹碑表墓昭銘景行俾芳烈奮于百世令聞顯於無窮其辭曰於休先生明德通玄純懿淑靈受之自天崇壯幽浚如山如淵禮樂是悅詩書是敦匪惟樵華乃尋厥根宮牆重仞允得其門懿乎其純確乎其操洋洋搢紳言觀其高棲遲泌丘善誘能教赫赫二事幾行其招委辭召貞保此清妙降年不永民斯悲悼爰勒茲銘摘其光耀嗟爾來世是則是效

陳太丘碑文 并序

蔡邕

先生諱寔字仲弓潁川許人也。含元精之和應期運之數兼資九德總脩百行於鄉黨則恂恂焉彬彬焉善誘善導仁而愛人使夫少長咸安懷之其爲道也用行舍藏進退可度不徼託以干時不遷怒以臨下四爲郡功曹五辟豫州六辟三府再辟大將軍宰聞喜牛歲太丘一年德務中庸教敦不虛政以禮成化行有謚會遭黨事禁錮二十年樂天知命澹然自逸交不諂上愛不瀆下見機而作不俟終日及文書赦宥時年已七十遂隱丘山懸車告老四門備禮閑心靜居大將軍何公司徒袁公前後招辟使人曉喻云欲特表便可入踐常伯超補三事紆佩金紫光國垂勳先生曰絕望已久飾巾待期而已皆遂不至弘農楊公東海陳公每在裘職羣寮贊

之皆舉手曰潁川郡陳君絕世超倫大位未躋慙於文仲竊位之負故時人高其德重乎公相之位也年八十有三中平三年八月丙午遭疾而終臨沒顧命畱葬所卒時服素棺槨財周觀喪事唯約用過乎儉羣公百寮莫不咨嗟巖藪知名失聲揮涕大將軍弔祠錫以嘉謚曰徵士陳君稟岳瀆之精苞靈曜之純天不憖遺老伊屏我王梁崩香萎于時靡憲猶紳儒林論德謀跡謚曰文範先生傳曰郁郁乎文哉書曰洪範九疇彝倫攸敘文爲德表範爲士則存誨沒號不亦宜乎三公遣令史祭以中牢刺史敬弔太守南陽曹府君命官作誄曰赫矣陳君命世是生含光醇德爲士作程資始旣正守終又冷奉禮終沒休矣清聲遣官屬掾吏前後赴會刊石作

銘府丞與比縣會葬。荀慈、明韓元長等五百餘人，總麻設位，哀以送之。遠近會葬，千人已上。河南尹种府君臨郡，追歎功德，述錄高行，以爲遠近鮮能及之。重部大掾以成時銘，斯可謂存榮沒哀，死而不朽者已。乃作銘曰：峩峩崇嶽，吐符降神。於皇先生，抱寶懷珍。如何昊穹，既喪斯文。微言比絕，來者曷聞。交交黃鳥，爰集于棘。命不可贖，哀何有極。

褚淵碑文 并序

王儉

夫太上有立德，其次有立功，此之謂不朽。所以子產云：「宣尼泣其遺愛，隨武既沒，趙文懷其餘風。」於文簡公見之矣。公諱淵，字彥回，河南陽翟人也。微子以至仁開基，宋段以功高命氏。爰逮兩漢，儒雅繼及。魏晉以降，奕世重暉。乃祖太傅元

穆公德合當時，行比州壤，深識臧否，不以毀譽形言。亮采王室，每懷冲虛之道，可謂婉而成章，志而晦者矣。自茲厥後，無替前規。建官惟賢，軒冕相襲。公稟川嶽之靈輝，含珪璋而挺曜。和順內凝，英華外發。神茂初學，業隆弱冠。是以仁經義緯，敦穆於閨庭；金聲玉振，寥亮於區宇。孝敬淳深，率由斯至。盡歡朝夕，人無間言。逍遙乎文雅之圃，翱翔乎禮樂之場。風儀與秋月齊明，音徽與春雲等潤。韻宇弘深，喜慍莫見。其際心明，通亮用人，言必猶於已。汪汪焉洋洋焉，可謂澄之不清，撓之不濁。袁陽源才氣高奇，綜覈精裁。宋文帝端明臨朝，鑒賞無昧。袁既延譽於遐邇，文亦定婚於皇家。選尚餘姚公主，拜駙馬都尉。漢結叔高，晉姻武子，方斯蔑如也。釋褐著作佐郎。

轉太子舍人。濯纓登朝。冠冕當世。升降兩宮。實惟時寶。具瞻之範。既著台衡之望。斯集出參。太宰軍事。入爲太子洗馬。俄遷祕書丞。贊道槐庭。司文天閣。光昭諸侯。風流籍甚。以父憂去職。喪過乎哀。幾將毀滅。有識聞感。行路傷情。服闋。除中書侍郎。王言如絲。其出如綸。恪居官次。智效惟穆。于時新安王寵冠列蕃。越敷邦教。毗佐之選。妙盡國華。出爲司徒右長史。轉尚書吏部郎。執銓以平。御煩以簡。裴楷清通。王戎簡要。復存於茲。泰始之初。入爲侍中。曾不移朔。遷吏部尚書。是時天步初夷。王途尚阻。元戎啓行。衣冠未緝。內贊謀謨。外康流品。制勝旣遠。涇渭斯明。賞不失勞。舉無失德。績簡帝心。聲敷物聽。事寧。領太子右衛率。固讓不拜。尋領驍騎將軍。以帷幄之

功。膺庸祇之秩。封零都縣開國伯。食邑五百戶。旣秉辭梁之分。又懷寢丘之志。所受田邑。不盈百井。久之。重爲侍中。領右衛將軍。盡規獻替。均山甫之庸。緝熙王旅。兼方叔之望。丹陽京輔。遠近攸則。吳興襟帶。實惟股肱。顯作二字。並加蟬冕。政以禮成。民是以息。明皇不豫。儲后幼冲。貽厥之寄。允屬時望。徵爲吏部尚書。領衛尉。固讓不拜。改授尚書右僕射。端流平衡。外寬內直。弘二八之高。譽宣由庚。而垂詠。太宗卽世。遺命以公爲散騎常侍。中書令。護軍將軍。送往事。居忠貞允亮。秉國之均。四方是維。百官象物。而動軍政。不戒而備。公之登泰階。而尹天下。君子以爲美談。亦猶孟軻致欣於樂正。羊職悅賞於士伯者也。丁所生母。憂謝職。毀疾之重。因心則至。朝議

以有爲爲之。魯侯垂式存公忘私。方進明准。爰降詔書。敦還攝任。固請移歲。表奏相望。事不我與。屈已弘化。屬值三季。在辰。威藩內侮。桂陽失圖。窺窬神器。鼓棹則滄波振蕩。建旗則日月蔽虧。出江派而風翔。入京師而雷動。鳴控絃於宗稷。流鋒鏃於象魏。雖英宰臨戎。元渠時殄。而餘黨寔繁。宮廟憂逼。公乃總熊羆之士。率不貳心之臣。戮力盡規。克寧禍亂。康國祚於綴流。拯王維於已墜。誠由太祖之威風。抑亦仁公之翼佐。可謂德刑詳禮。義信戰之器也。以靜難之功。進爵爲侯。兼授尚書令中軍將軍。給班劔二十人。功成弗有。回秉撝挹。改授侍中中書監護軍如故。又以居母艱。去官。雖事緣義感。而情均天屬。顏丁之合禮。二連之善喪。亦曷以踰天厭。宋德水

運告謝。嗣主荒怠於天位。懼臣憑陵於荆楚。廢昏繼統之功。龕亂寧民之德。公實仰贊宏規。參聞神算。雖無受版出車之庸。亦有甘寢秉羽之績。乃作司空。山川攸序。兼授衛軍。戎政輯睦。旣而齊德龍興。順皇高禪。深達先天之運。匡贊奉時之業。彌諸允正。徽猷弘遠。樹之風聲。著之話言。亦猶稷契之臣。虞夏荀裴之奉。魏晉自非坦懷至公。永監崇替。孰能光輔五君。黃亮一代者哉。大啓南康。爰登中鉉。時膺土宇。固辭邦教。今之尚書令。古之冢宰。雖秩輕於袞司。而任隆於百辟。躋遂冲旨。改授朝端。邇無異言。遠無異望。帝嘉茂庸。重申前冊。執五禮以止民簡。入刑而罕用。故能騁績康衢。延慈哲后。義在資敬。情同布衣。出陪鑿躡。入奉帷殿。仰南風之高詠。餐東野

之祕寶。雅議於聽政之晨。披文於宴私之夕。參以酒德。間以琴心。曖有餘暉。遙然留想。君垂冬日之溫。臣盡秋霜之戒。肅肅焉。穆穆焉。於是見君親之同致。知在三之如一。太祖升遐。綢繆遺寄。以待中司徒錄尚書事。稟玉几之顧。奉綴衣之禮。擇皇齊之令典。致聲化於雍熙。內平外成。實昭舊職。增給班劍三十人。物有其容。徽章斯允。位尊而禮卑。居高而思降。自夏徂秋。以疾陳退。朝廷重違謙光之旨。用申超世之尚。改授司空。領驃騎大將軍。侍中錄尚書如故。景命不永。大漸彌留。建元四年八月二十一日。薨於私第。春秋四十有八。昔柳莊疾棘衛君。當祭而輟禮。晏嬰既往。齊君趨車而行。哭公之云。亡聖朝震悼於上。羣后恆慟於下。豈惟哀纏。國痛深一主。

而已哉。追贈太宰侍中錄尚書如故。給節羽葆鼓吹。班劍爲六十人。謚曰文簡。禮也。夫乘德而處。萬物不能害其貞。虛已以游。當世不能擾其度。均貴賤於條風。忘榮辱於彼我。然後可兼善天下。聊以卒歲。經始圖終。式免祗悔。誰云克備公實有焉。是以義結君子。惠霑庶類。言象所未形。述詠所不盡。故吏某甲等。感逝川之無捨。哀清暉之眇默。餐輿誦於丘里。瞻雅詠於京國。思衛鼎之垂文。想晉鐘之遺則。方高山而仰止。刊玄石以表德。其辭曰。

辰精感運。昴靈發祥。元首惟明。股肱惟良。天鑑璿曜。踵武前王。欽若元輔。體微知章。永言必孝。因心則友。仁洽兼濟。愛渙善誘。觀海齊量。登嶽均厚。五臣茲六。八元斯九。內暮帷幄。外

瞻台階遠無不肅通無不懷如風之偃如樂之諧光我帝典
緝彼民黎率禮蹈謙諒實身幹跡屈朱軒志隆衡館眇眇玄
宗萋萋辭翰義既川流文亦霧散嵩構云積梁陰載缺德猷
靡副儀形長遞昭悵餘微鏘洋遺烈久而彌新用而不竭

頭陀寺碑文

王巾

蓋聞挹朝夕之池者無以測其淺深仰蒼蒼之色者不足知
其遠近况視聽之外若存若亡心行之表不生不滅者哉是
以掩室摩竭用啓息言之津杜口毗邪以通得意之路然語
彛倫者必求宗於九疇談陰陽者亦研幾於六位是故三才
既辨識妙物之功萬象已陳悟太極之致言之不可以已其
在茲乎然交繫所筌窮於此域則稱謂所絕形乎彼岸矣彼

岸者引之於有則高謝四流推之於無則俯弘六度名言不
得其性相隨迎不見其終始不可以學地知不可以意生及
其涅槃之蘊也夫幽谷無私有至斯響洪鐘虛受無來不應
況法身圓對規矩冥立一音稱物宮商潛運是以如來利見
迎維託生王室憑五衍之軼拯溺逝川開八正之門大庇交
喪於是玄關幽鍵感而遂通遙源濬波酌而不竭行不捨之
檀而施洽羣有唱無緣之慈而澤周萬物演勿照之明而鑒
窮沙界導亡機之權而功濟塵劫時義遠矣能事畢矣然後
拂衣雙樹脫屣金沙惟恍惟惚不覺不昧莫繫於去來復歸
於無物因斯而談則棲遑大千無爲之寂不撓焚燎堅林不
盡之靈無歇大矣哉正法既沒象教陵夷穿鑿異端者以遠

方爲得一順非辯僞者比微言於目論於是馬鳴幽讚龍樹
虛求並振頽綱俱維絕紐蔭法雲於真際則火宅長涼耀慧
日於康衢則重昏夜曉故能使三十七品有樽俎之節九十
六種無藩籬之固既而方廣東被教肆南移周魯一莊親照
夜景之鑒漢晉兩明並勒丹青之飾然後遺文間出列刹相
望澄什結轍於山西林遠肩隨乎江左矣頭陀寺者沙門釋
慧宗之所立也南則大川浩汗雲霞之所沃蕩北則層峰削
成日月之所迴薄西眺城邑百雉紆餘東望平臯千里超忽
信楚都之勝地也宗法師行繫瑤壁擁錫來游以爲宅生者
緣業空則緣廢存軀者惑理勝則惑亡遂欲捨百齡於中身
殉肌膚於猛鷲班荆蔭松者久之宋大明五年始立方丈茅

茨以庇經象後軍長史江夏內史會稽孔府君諱凱爲之難
草開林置經行之室安西將軍郢州刺史江安伯濟陽蔡使
君諱興宗復爲崇基表剎立禪誦之堂焉以法師景行大迦
葉故以頭陀爲稱首後有僧勤法師貞節苦心求仁養志纂
修堂宇未就而沒高軌難追藏舟易遠僧徒聞其無人棧椽
毀而莫構可爲長太息矣惟齊繼五帝洪名紐三王絕業祖
武宗文之德昭升嚴配格天光表之功弘啓興復是以惟新
舊物康濟多難步中雅頌驟合韶護炎區九澤沙場一候粵
在於建武焉乃詔西中郎將郢州刺史江夏王觀政藩維樹
風江漢擇方城之令典酌龜蒙之故實政肅刑清於是乎在
寧遠將軍長史江夏內史行事彭城劉府君諱誼智刃所遊

日新月故。道勝之韻。虛往實歸。以此寺業廢於已安。功墜於
幾立。慨深覆篲。悲同棄井。因百姓之有餘閒。天下之無事屯。
徒揆日。各有司存。於是民以悅來。工以心競。且丘被陵。因高
就遠。層軒延袤。上出雲霓。飛閣逶迤。下臨無地。夕露爲珠。網
朝霞爲丹。履九衢之草千計。四照之花萬品。崖谷共清風。泉
相渙。金姿寶相。永藉閑安。息心了義。終焉游集。法師釋曇珍。
業行淳修。理懷淵遠。今屈知事任。永奉神居。夫民勞事功。旣
鏤文於鐘鼎。言時稱代。亦樹碑於宗廟。世彌積而功宜。身逾
遠而名紹。敢寓言於彫篆。庶髣髴乎衆妙。其辭曰。

質判玄黃。氣分清濁。法器千名。含靈萬族。淳源上派。澆風下
黷。愛流成海。情塵爲岳。皇矣能仁。撫期命世。乃睠中土。聿來
迦衛。奄有大千。遂荒三界。殷鑒四門。幽求六歲。亦旣成德。妙
盡無爲。帝獻方石。天開淥池。祥河輟水。實樹低枝。通莊九折。
安步三危。川靜波澄。龍翔雲起。者山廣運。給園多士。金粟來
儀。文殊戾止。應乾動寂。順民終始。法本不然。今則無滅。象正
雖闌。希夷未缺。於昭有齊。式揚洪烈。釋網更維。玄津重柅。惟
此名區。禪慧攸託。倚據崇巖。臨眺通壑。溝池湘漢。堆阜衡霍。
廡廡亭臯。幽幽林薄。媚茲邦后。法流是挹。氣茂三明。情超六
入。眷言靈宇。載懷興葺。丹刻翬飛。輪奐離立。象設旣闢。辟容
已安。桂深冬燠。松疎夏寒。神足游息。靈心往還。勝幡西振。貞
石南刊。

齊故安陸昭王碑文

沈約

公諱緬字景業南蘭陵人也稷契身佐唐虞有大功於天地
商武姬文所以膺圖受籙蕭曹扶翼漢祖滅秦項以寧亂魏
氏時乘於前皇齊握符於後靈源與積石爭流神基與極天
比峻祖宣皇帝雄材盛烈名蓋當時考景皇帝含道居貞卷
懷前代公含辰象之秀德體河岳之上靈氣蘊風雲身負日
月立行可模置言成範英華外發清明內昭天經地義之德
因心必盡簡久遠大之方率由斯至挹其源者游泳而莫測
懷其道者日用而不知昭昭若二辰之麗于天滔滔猶四瀆
之紀于地六幽允洽一德無爽萬物仰之而彌高千里不言
而斯應若夫彈冠出仕之日登庸治事之年軍麾命服之序
監督方部之數斯固國史之所詳今可得而畧也水德方衰

天命未改太祖龍躍俟時作鎮淮泗如仁夕惕之志中夜九
迴龕世拯亂之情獨用懷抱深圖密慮衆莫能窺公陪奉朝
夕從容左右蓋同王子洛濱之歲實惟辟疆內侍之年起予
聖懷發言中直始以文學游梁俄而入掌綸誥蘭桂有芬清
暉自遠帝出于震日衣青光方軌茅社俾侯安陸受瑞析珪
遂荒雲野式掌儲命帝難其人公以宗室羽儀允膺嘉選協
隆三善仰敷四德博望之苑載暉龍樓之門以峻獻替帷展
實掌喉唇奉待漏之書銜如絲之旨前暉後光非止恒授公
以密戚上賢俄而奉職出納惟允劍璽增華伊昔帝唐九官
咸事熊豹臨鉞納言是司自此迄今其任無爽爰自近侍式
贊權衡而皇情眷眷慮深未瘼姑蘇與壤任切關河都會殷

負提封百萬全趙之衮服叢臺方此爲劣臨淄之揮汗成雨
曾何足稱乃鴻鸞舊吳作守東楚弘義讓以勗君子振平惠
以字小人撫同上德綏用中典疑獄得情而弗喜宿訟兩讓
而同歸雖春申之大啓封疆鄧攸之緝熙氓庶不能尚也夏
首藩要任重推轂衿帶中流地殷江漢南接衡巫風雲之路
千里西通鄭鄧水陸之塗三七是惟形勝闕外莫先建麾作
牧明德攸在乃暴以秋陽威以夏日澤無不漸螻蟻之穴靡
遺明無不察容光之微必照由近而被遠自己而及物惠與
八風俱翔德與五材並運遠無不懷邇無不肅邑居不聞夜
吠之犬牧人不覩晨飲之羊譽表六條功最萬里還居近侍
兼饗戎秩候府寄隆儲端任顯東西兩晉茲選特難羊琇願

言而匪獲謝琰功高而後至升降二宮令績斯俟禁旅尊嚴
主器彌固禹穴神臯地埒分陝江左以來常遞斯任東渚距
海南望秦稽淵藪胥萃藿蒲攸在貨殖之民千金比屋郭壘
之內雲屋萬家刑政繁舛舊難詳一南山羣盜未足云多渤
海亂繩方斯易理公下車敷化風動神行誠恕旣孚鉤距靡
用不待赭汗之權而奸渠必翦無假里端之籍而惡子咸誅
被以哀矜孚以信順南陽葦杖未足比其仁潁川時雨無以
豐其澤公攬轡升車牧州典郡感達民祗非待期月老安少
懷塗歌里詠莫不歡若親戚芬若椒蘭麾旆每反行悲道泣
攀車臥轍之戀爭塗忘遠去思一借之情愈久彌結方城漢
池南顧莫重北指嶠潼平塗不過七百西接曉武關路曾不

盈千蠻陬夷徼重山萬里小則俘民略畜大則攻城剽邑晉
宋迄今有切民患烽鼓相望歲時不息推埋穿掘之黨阡陌
成羣傲法侮吏之人曾莫禁禦累藩咸受其弊歷政所不能
裁加以戎羯窺窬伺我邊際北風未起馬首便以南向塞草
未衰嚴城於焉早閉永明八載疆場大駭天子乃心北眷聽
朝不怡揚旆漢南非公莫可於是驅馬原隰卷甲過征威令
首塗仁風載路軌躅清晏車徒不擾牛酒日至壺漿塞百失
義大半其來久矣徵賦嚴切唯利是求首鼠疆界災蠹滲廣
公扇以廉風孚以誠德盡任棠置水之情弘郭伋待期之信
金如粟而弗覩馬如羊而靡入雛雉必懷豚魚不爽由是傾
巢舉落望德如歸推髻鬢首日拜門闕卉服滿塗夷歌成韻

禮義旣敷威刑具舉疆民獷俗反志遷情風塵不起囹圄寂
寞富商野次宿秉停苗蝥蝗弗起豺虎遠跡北狄懼威關塞
謐靜偵諜不敢東窺駝馬不敢南牧方欲振策燕趙席卷秦
代陪龍駕於伊洛侍紫蓋於咸陽而遘疾彌留歛焉大漸耕
夫釋耒桑婦下機參請門衢並走羣望維永明九年夏五月
三十日辛酉薨春秋二十有七城府颯然庶僚如賈男女老
幼大臨街衢接響傳聲不踰時而達于四境夷羣戎落幽遠
必至望城拊膺震動郭邑並求入奉靈輓藩司抑而弗許雖
鄧訓致勞面之哀羊公深罷市之慕對而爲言遠有漸德神
駕東還號送踰境奉觴奠以望靈仰蒼天而自訴震響成雷
盈塗咽水公臨危審正載貽話言楚囊之請雖幾而彌固衛

魚之心身亡而意結二宮軫慟遐邇同哀追贈侍中領衛將軍給鼓吹一部諡曰昭侯時皇上納麓在辰登庸伊始允副朝端兼掌屯衛聞凶哀震感絕移時因邁沈痾緜留氣序世祖日夜憂懷備盡寬譬勉膳禁哭中使相望上雖外順皇旨內殷私痛獨居不御酒肉坐臥泣涕霑衣若此移年權瘳改貌天倫之愛振古莫儔及俯膺天眷入纂絕業分命懿親台牧並建對繁弱以流涕望曲阜而含悲改贈司徒因諡爲郡王禮也惟公少而英明長而弘潤風標秀舉清暉映世學編書部特善玄言肇悅之麗篆籀之則第六義於懷抱究八體於毫端齊思之微秋儲無以競巧取睽之妙流睇未足稱奇至公以奉上鳴謙以接下撫僚庶盡盛德之容交上林忘公

侯之貴虛懷博納幽關洞開宴語談笑情瀾不竭譽滿天下德冠生民蓋百代之儀表千年之領袖曾不慙畱梁摧奄及豈唯僑終寒謝興誑輟相而已哉凡我僚舊均哀共戚怨天德之無厚痛棠陰之不畱思所以克播遺塵敝之穹壤乃刊石圖徽寄情銘頌其辭曰

天命玄鳥降而生商是開金運祚始玉筐三仁去國五曜入房亦白其馬侯服周王本枝派別因菜命氏涉徐而東義均梁徙自茲以降懷青拖紫崇基巖巖長瀾瀾瀾惟聖造物龍飛天步載鼎載革有除有布高皇赫矣仰膺乾顧景皇蒸哉實啓洪祚喬嶽峻峙命世興賢應期誕德絕後光前幾以成務覺在民先位非大寶爵乃上天爰始濯纓清猷濬發升降

文陛透迤魏闕惠露霑吳仁風扇越涉夏踰漢政成期月用
簡必從日新為盛在上哀矜臨下莊敬草木不夭昆蟲得性
我有芳蘭民胥攸詠羣夷蠢蠢巖別嶂分傾山盡落其從如
雲挈妻荷子負戴成羣廻首請吏曾何足云晉聞天道仁罔
不遂彼蒼如何興山止簣四牡方馳六龍頓轡斯民曷仰邦
國殄瘁齊隕晏平行哭致禮趙祖昌國列邦揮涕泥我君斯
皇之介弟哀感徒庶慟興雲陛階毀留攢川沈歸軸競羞野
奠爭攀去轂遵渚號追臨渡望哭無絕終古惟蘭與菊塗由
帝渚朱軒靡駕東首瑩園卽宮長夜逝川無待黃金難化鐘
石徒刊芳猷永謝

墓誌類

劉先生夫人墓誌

任昉

既稱萊婦亦曰鴻妻復有令德一與之齊實佐君子簪蒿杖
藜欣欣負載在冀之畦居室有行亟聞義讓稟訓丹陽弘風
丞相籍甚二門風流遠尚肇允才淑闕德斯諒蕪沒鄭鄉寂
寥楊冢參差孔樹毫末成拱暫啓荒延長局幽隴夫貴妻尊
匪爵而重

行狀類

齊竟陵文宣王行狀

任昉

祖太祖高皇帝

父世祖武皇帝

南徐州南蘭陵郡縣都鄉中都里蕭公年三十五行狀

公道亞生知照隣幾庶孝始人倫忠爲令德公實體之非毀
譽所至天才博瞻學綜該明至若曲臺之禮九師之易樂分
龍趙詩析齊韓陳農所未究河間所未輯有一於此罔不兼
綜者歟昔沛獻訪對於雲臺東平齊聲於楊史淮南取貴於
食時陳思見稱於七步方斯蔑如也初沈攸之跋扈上流稱
亂陝服宋鎮西晉熙王南中郎邵陵王並鎮益口世祖毗贊
兩藩而任總西伐公時從在軍鎮西府版寧朔將軍軍主南
中郎版補行參軍署法曹于時景燭雲火風馳羽檄謀出股
肱任切書記遷左軍邵陵王主簿記室參軍既允焚林之求
實兼儀形之寄刀筆不足宣功風體所以弘益除邵陵王友
又爲安南邵陵王長史東夏形勝關河重複選衆而舉敦悅

斯在除使持節都督會稽東陽臨海永嘉新安五郡諸軍事
輔國將軍會稽太守太祖受命廣樹藩屏公以高昭武穆惟
戚惟賢封聞喜縣開國公食邑千戶又以奏課連最進號冠
軍將軍越人之巫覩正風而化俗篁竹之首感義讓而失險
邪叟忘其西具龍丘挾其東皇會武穆皇后崩公星言奔波
泣血千里水漿不入於口者至自禹穴逮衣裳外除心哀內
疚禮屈於厭降事迫於權奪而茹感肌膚沉痛創距故知鐘
鼓非樂云之本綖旛非隆殺之要改授征虜將軍丹陽尹良
家入徙戚里內屬政非軌俗備五方公內樹寬明外施簡
惠神臯載穆轂下以清武帝嗣位進封竟陵郡王食邑如千
戶復授使持節都督南徐兗二州諸軍事鎮北將軍南徐州

刺史遷使持節侍中都督南兗徐北兗青冀五州諸軍事征
北將軍南兗州刺史兗徐接壤素漸河潤未及下車仁聲先
洽玉關靖柝北門寢扃朝旨以董司岳牧敷興邦教方任雖
重比此爲輕徵護軍將軍兼司徒侍中如故又授車騎將軍
兼司徒侍中如故卽授司徒侍中又如故上穆三能下敷五
典闢玄闈以闡化寢鳴鐘以體國翼亮孝治緝熙中教奪金
駟訟蹊田自嘿不彫其朴用晦其明聲化之有倫繫公是賴
庠序肇興儀形國胄師氏之選允歸人範以本官領國子祭
酒固辭不拜入座初啓以公補尚書令式是敷奏自按特序
夫國家之道互爲公私君親之義遞爲隱犯公二極一致愛
敬同歸亮誠盡規謀猷弘遠矣又授使持節都督揚州諸軍

事揚州刺史本官悉如故舊惟淮海今則神牧編戶殷阜萌
俗滋繁不言之化若門到戶說矣頃之解尚書令改授中書
監餘悉如故獻納樞機絲綸允緝武皇晏駕寄深負圖公仰
惟國典俛遵遺託俯擬天倫踊絕于地居處之節復如居武
穆之憂聖主嗣興地居旦爽有詔策授太傅領司徒餘悉如
故坐而論道動以觀德地尊禮絕親賢莫貳又詔加公入朝
不趨讚拜不名劔履上殿肅傅之賢曹馬之親兼之者公也
復以申威重道增崇德統進督南徐州諸軍事餘悉如故並
表疏累上身沒讓存天不憖遺梁岳頽峻某年某月日薨春
秋三十有五詔給溫明秘器歛以袞章備九命之禮遣大鴻
臚監護喪事朝夕奠祭太官供給禮也故以慟極津門感充

長樂。豈徒春人不相傾壘罷肆而已哉。乃下詔曰。褒崇庸德。前王之令典。追遠尊戚。公情之所隆。故使持節都督揚州諸軍事中書監太傅領司徒揚州刺史竟陵王。新除進督南徐州體。睿履正神。鑒淵邈道冠民宗。具瞻惟允。肇自弱齡。孝友光備。爰及贊契。協升景業。燮和台曜。五教克宣。敷奏朝端。百揆惟穆。寄重先顧。任均負圖。諒以齊徽。一南同規。往哲方憑。保佑永翼。雍熙天不。愁遺奄見。薨落哀慕。抽割震動于厥心。今先遠戒期。龜謀襲吉。茂崇嘉制。式弘風猷。可追崇假黃鉞侍中都督中外諸軍事太宰領大將軍揚州牧綠綬。授具九錫服。命之禮。使持節中書監王如故。給九旒鑿輅黃屋左纛。輜輶車前後部羽葆鼓吹挽歌二部。虎賁班劍百人。葬禮。

依晉安平獻王孚故事。公道識虛遠。表裏融通。淵然萬頃。直上干仞。僕妾不覩其喜。慍近侍莫見其傾。弛他人之善。若己有之。民之不臧。公實貽恥。誘接恂恂。降以顏色。方於事上好。下規已而廉於殖財。施人不倦。帝子儲李。令行禁止。國綱天憲。實諸掌握。未嘗鞠人於輕刑。銅人於重議。人有不及。內怨諸已。非意相干。每爲理屈。任天下之重。體生民之俊。華袞與縕緒同歸。山藻與蓬茨俱逸。良田廣宅。符仲長之言。邱山洛水。協應叟之志。丘園東國。錙銖軒冕。乃依林構宇。傍巖拓架。清媛與壺人爭日。緹幙與素瀨交輝。置之虛室。人野何辨。高人何點。躡屩於鐘阿。徵士劉虬獻書於衡岳。贈以古人之服。弘以度外之禮。屈以好士之風。申其趨王之意。乃知大春屈。

已五王君大降節憲后致之有由也其卉木之奇泉石之美
公所製山居四時序言之已詳文皇帝養德東朝同符作者
爰造九言實該百行遵衿襜於未萌申炯戒於茲日非直且
暮千載故乃萬世一時也命公註解衛將軍王儉綴而序之
山宇初構超然獨往顧而言曰死者可歸誰與入室尚想前
良俾若神對乃命畫工圖之軒牖既而網屬賢英傍思才淑
匹婦之操亦有取焉有客游梁朝者從容而進曰未見好德
愚竊惑焉即命刊削投杖不暇公以為出言自口驥驟不追
聽受一謬差以千里所造箴銘積成卷軸門階戶席寓物垂
訓先是震于外寢匠者以為不祥將加治昔公曰此天譴也
無所改脩以記吾過且令戒懼不怠從諫如順流虛已若不

足至於言窮藥石若味滋音信必由中貌無外悅貴而好禮
怡寄典墳雖率以物役孜孜無怠乃撰四部要略淨任子並
勒成一家懸諸日月弘洙泗之風闡迦維之化人漸彌聞話
言盈耳黜殞之請至誠懇惻豈古人所謂立言於世沒而不
朽者歟易名之典請遵前列謹狀

弔文類

弔屈原文 并序

賈誼

誼為長沙王太傅既以謫去意不自得及渡湘水為賦以弔
屈原屈原楚賢臣也被讒放逐作離騷賦其終篇曰已矣哉
國無人兮莫我知也遂自投汨羅而死誼追傷之因以自喻
其辭曰恭承嘉惠兮俟罪長沙側聞屈原兮自沉汨羅造託

湘流兮敬弔先生遭世罔極兮乃隕厥身嗚呼哀哉逢時不
祥鸞鳳伏竄兮鳴臬翱翔關茸尊顯兮讒諛得志賢聖逆曳
兮方正倒植世謂隨夷為溷兮謂跼蹐為廉莫邪為鈍兮鈇
刀為銛吁嗟默默生之無故兮幹棄周鼎寶康瓠兮騰駕罷
牛驂塞驢兮驥垂兩耳服鹽車兮章甫薦履漸不可久兮嗟
苦先生獨離此咎兮訊曰已矣國其莫我知兮獨壹鬱其誰
語鳳漂漂其高逝兮固自引而遠去襲九淵之神龍兮沕深
潛以自珍伺螻蟻以隱處兮夫豈從蝦與蛭蟻所貴聖人之
神德兮遠濁世而自藏使騏驥可得係而羈兮豈云異夫犬
羊般紛紛其離此尤兮亦夫子之故也歷九州而相其君兮
何必懷此都也鳳凰翔于千仞兮覽德輝而下之見細德之

險徵兮遙增擊而去之彼尋常之汗瀆兮豈能容夫吞舟之
巨魚橫江湖之鱣鯨兮固將制於螻蟻

弔魏武帝文 并序

陸機

元康八年機始以臺郎出補著作游乎秘閣而見魏武帝遺
令愴然歎息傷懷者久之客曰夫始終者萬物之大歸死生
者性命之區域是以臨喪殯而後悲觀陳根而絕哭今乃傷
心百年之際興哀無情之地意者無乃知哀之可有而未識
情之可無乎機答之曰夫日蝕由乎交分山崩起於朽壤亦
云數而已矣然百姓怪焉者豈不以資高明之質而不免卑
濁之累居常安之勢而終嬰傾離之患故乎夫以迴天倒日
之力而不能振形骸之內濟世夷難之智而受困魏闕之下

已而格乎上下者。藏於區區之木。光于四表者。翳乎臺爾之土。雄心摧於弱情。壯圖終於哀志。長算屈於短日。遠跡頓於促路。嗚呼。豈特瞽史之異闕。景黔黎之怪頽。岸乎觀其所以。顧命冢嗣。貽謀四子。經國之略。既遠。隆家之訓。亦弘。又云。吾在軍中。持法是也。至於小忿。怒大過失。不當效也。善乎。達人之讜言矣。持姬女而指季豹。以示四子。日以累汝。因泣下。傷哉。曩以天下自任。今以愛子託人。同乎盡者無餘。而得乎二者。無存。然而姚嬖房闈之內。綢繆家人之務。則幾乎密與。又曰。吾婕妤。妓人皆著銅雀臺於臺堂上。施八尺牀。張總帳。朝脯。上脯。脯之屬。月朝十五日。輒向帳作妓汝等時。時登銅雀臺。望吾西陵墓田。又云。餘香可分與諸夫人。諸舍中無所爲。

學作履組賣也。吾歷官所得。綬皆著藏中。吾餘衣裘。可別爲一藏。不能者。兄弟可共分之。既而竟分焉。亡者可以勿求。存者可以勿違。求與違不其兩傷乎。悲夫。愛有大而必失。惡有甚而必得。智惠不能去其惡。威力不能全其愛。故前識所不用心。而聖人罕言焉。若乃繫情累於外物。畱曲念於閨房。亦賢俊之所宜廢乎。於是遂憤懣而獻弔云爾。

接皇漢之末緒。值王塗之多違。佇重淵以育麟。撫慶雲而遐飛。運神道以載德。乘靈風而扇威。摧羣雄而電擊。舉勅敵其如遺。指八極以遠略。必翦焉而後綏。登三才之闕典。啓天地之禁闈。舉脩網之絕紀。紐大音之解徽。掃雲物以貞觀。要萬塗而來歸。丕大德以宏覆。援日月而齊暉。濟元功於九有。固

舉世之所推彼人事之大造夫何往而不臻將覆篲於浚谷
擠爲山乎九天苟理窮而性盡豈長算之所研悟臨川之有
悲固梁木其必顛當建安之三入實大命之所艱雖光昭於
曩載將稅駕於此年惟降神之縣邈眇千載而遠期信斯武
之未喪膺靈符而在茲雖龍飛於文昌非王心之所怡憤西
夏以鞠旅沂秦川而舉旗踰鎬京而不豫臨渭濱而有疑冀
翼日之云瘳彌四旬而成災詠歸塗以反旆登嶠澗而竭來
次洛汭而大漸指六軍曰念哉伊君王之赫奕寔終古之所
難威先天而蓋世力盪海而拔山厄奚險而弗濟敵何疆而
不殘每因禍以禔福亦踐危而必安迄在茲而蒙昧慮噤閉
而無端委軀命以待難痛沒世而永言撫四子以深念循膚

體而積歎迨營鬼之未離假餘息乎音翰執姬女以嘔瘁指
季豹而淮焉氣衝襟以嗚咽涕垂睫而沈瀾違率土以靜寐
戢彌天乎一摧咨宏度之峻邈壯大業之允昌思居終而恤
始命臨沒而肇揚援貞吝以基悔雖在我而不臧惜內顧之
纏絲恨末命之微詳紆廣念於履組塵清慮於餘香結遺情
之婉變何命促而意長陳法服於帷座陪窈窕於玉房宣備
物於虛器發哀音於舊倡矯感容以赴節掩零淚而薦觴物
無微而不存體無惠而不亡庶聖靈之響像想幽神之復光
苟形聲之翳沒雖音景其必藏微清絃而獨奏進脯糒而誰
嘗悼總帳之冥漠怨西陵之茫茫登雀臺而羣悲貯美日其
何望旣踰古以遺累信簡禮而薄葬彼裘紱於何有貽塵謗

於後王嗟大戀之所存故雖哲而不忘覽遺籍以慷慨獻茲
文而悽傷

祭文類

祭古冢文 并序

謝惠連

東府掘城北塹入丈餘得古冢上無封域不用磚甃以木爲
槨中有二棺正方兩頭無和明器之屬材瓦銅漆有數十種
多異形不可盡識刻木爲人長三尺可有二十餘頭初開見
悉是人形以物振撥之應手灰滅棺上有五銖錢百餘枚水
中有甘蔗節及梅李核瓜瓣皆浮出不甚爛壞銘誌不存世
代不可得而知也公命城者改埋於東岡祭之以豚酒旣不
知其名字遠近故假爲之號曰冥漠君云爾

元嘉七年九月十四日司徒御屬領直兵令史統作城錄事
臨漳令亭侯朱林具豚醪之祭敬薦冥漠君之靈忝總徒旅
版築是司窮泉爲漣聚壤成基擲旣啓雙棺在茲拾畚悽
愴縱鍾漣而芻靈已毀塗車旣摧几筵糜腐俎豆傾低盤或
梅李益或醢醢蔗傳餘節瓜表遺犀追惟夫子生自何代曜
質幾年潛靈幾載爲壽爲夭寧顯寧晦銘誌堙滅姓字不傳
今誰子後曩誰子先功名美惡如何茂然白堵皆作十仞斯
齊墟不可轉漣不可迴黃腸旣毀便房已頽循題興念撫備
增哀射聲垂仁廣漢流渥祠骸府阿掩骼城曲仰羨古風爲
君改卜輪移北墜窀穸東麓壙卽新營棺仍舊木合葬非古
周公所存敬遵昔義還耐雙魂酒以兩壺牲以特豚幽靈髣

髯歆我犧樽嗚呼哀哉

祭屈原文

顏延之

維有宋五年月日湘州刺史吳郡張邵恭承帝命建旗舊楚
訪懷沙之淵得捐珮之浦弭節羅潭艤舟汨渚乃遣尸曹掾
某敬祭故楚三閭大夫屈君之靈蘭薰而摧玉纁則折物忌
堅芳人諱明潔日若先生逢辰之缺溫風息時飛霜急節羸
芋邁紛昭懷不端謀折儀尚貞茂椒蘭身絕郢闕跡徧湘干
比物荃蓀連類龍鸞聲溢金石志華日月如彼樹芬實穎實
發望汨心歆瞻羅思越藉用可塵昭忠難闕

祭顏光祿文

土僧達

維宋孝建三年九月癸丑朔十九日辛未王君以山羞野酌

敬祭顏君之靈嗚呼哀哉夫德以道樹禮以仁清惟君之懿
早歲飛聲義窮幾象文蔽班揚性粹剛絜志度淵英登朝光
國實宋之華才通漢魏譽浹龜沙服爵帝典棲志雲阿清交
素友比景共波氣高叔夜嚴方仲舉逸翮獨翔孤風絕侶流
連酒德嘯歌琴緒游顧移年契濶宴處春風首時爰談爰賦
秋露未凝歸神太素明發晨駕瞻廬望路心懷目茲情條雲
互涼陰掩軒娥月寢耀微燈動光几牘誰炤衾衽長塵絲竹
罷調學悲蘭宇屑涕松嶠古來共盡牛山有淚非獨吳天磯
我明懿以此忍哀敬陳奠饋申酌長懷顧望獻歆嗚呼哀哉

古來所傳國刻文選正文若干悉皆以國字左右附注如馬駘
 之足塾師授之弟子受之讀畢而不知歷代諸家之作譬諸蟻
 膠買攢亦唯有勞無功而已南郭服老國之刻白文以授之善
 則善矣未讀而韞匱之世遂無知之者唯吾山子執中譯之有
 益學者是以東西南北一皆從之無幾而前版磨滅風月堂氏
 欲翻刻之抑此書前版雕刻既成而後使吾友萬子福按之雖
 有謬誤難改正者有之曲從以至今日則請余校閱之而余衰
 老多事則一二閱之而使見譙重訂之於是文字誤者國幾失
 者其譚紕繆者數千盡改之以授剞劂氏雖然蕭氏所選數十
 萬言焉期不有少遺漏哉乃其補闕拾遺當俟後之學者矣

文政癸未冬十一月 信州久保愛識



天明四年甲辰 元刻

文政十一年戊子 再刻

嘉永三年庚戌 三刻

京師書肆 風月庄左衛門

尾陽書肆 風月孫 助

